

三水縣志卷二

知縣朱廷模主修

陽湖孫星衍撰

山屬四

三水縣山名最古者周書度邑解云王乃升汾之阜以望商邑今不知其何阜石門山見史記括地志並云見于堯時今其半入淳化又太平寰宇記于縣載子午山馬嶺山女郎山今子午山馬嶺山半入甘肅真寧女郎山按元和郡縣志云洛原縣白於山一名女郎山在今甘肅安化縣界亦與縣境不甚遠而舊志空疏皆未及載今依採焉其餘諸山經傳不著直見舊志方俗稱名而已

史記秦本紀獻公二十一年與晉戰于石門正義括地志云堯門山俗名石門在雍州三原縣西北上有路若門故老云堯鑿

三水縣志卷二

山爲門因名之

地形志高平有石門山

元和郡縣志三水縣石門山在縣東五十里峯巖相對望之似門

太平寰宇記三水縣石門山王褒雲陽宮記東北有石門崗巒糾紛千霄秀出有石巖容數百人甘泉賦云封巒石闕施摩虜延屬

新唐書地理志三水有石門山

金史地理志三水有石門山

明邠州志石門山在縣東六十里俗傳秦太子扶蘇賜死處碑刻墮落不可考

縣舊志石門山亦名堯門堯鑿之以洩洪水至漢更名石門山

在縣東南爲豳國之鎮高峻插天對峙如門以漢武於此立關
爲名

星衍按石門之名在秦獻公時見史記秦本紀則括地志云俗
名非

明劉翀石門卽事詩云峻嶒石壁千山遶豁達雙門一逕開
更有藤蘿淹日月豈無龍虎出蒿萊空中樓閣供竒玩眼底
風雲起俊才聞說扶蘇遺廟在年年烟雨爲誰哀

右石門山

初學記水經注曰白水源出汾水嶺西

太平寰宇記三水縣翟道山一名子午山

按三水北與徵寧接
界子午山在徵寧故云

縣舊志分水嶺當縣之東北九十里其嶺上接子午北入大漠
東爲延州西爲慶州

三水縣志卷二

二

星衍案初學記所載汾水嶺在鄜州三水正與鄜州接境知汾
水嶺卽縣志所云分水嶺

右子午山一名汾水嶺

太平寰宇記三水縣馬嶺山俗名箭括嶺抵慶州界有馬嶺水
出焉

通志在縣西北六十里

右馬嶺山

元和郡縣志白於山一名女郎山

太平寰宇記三水縣華池女郎山並在郡邑

右女郎山

賈志中嶺在縣東堡嶺之右高下有穴數十容百人俗傳漢盧

芳所鑿今名官家洞

按盧芳所據三水在
甘肅涇州非此三水

明邠州志官家石洞在縣東北三十里宋金人避兵于此其山高三百尺上有石室三百餘內有石門石坑石窗至正九年造有碑下有觀音湫

縣舊志亦名飛雲洞卽古公陶復陶穴者

元官家石洞碑

名失

居士蕭元義在御史見居斯窟顯清縣尹

睢恭娘子張氏達魯花赤禿堅帖木兒夫人周氏趙氏亦居

此處四方常安黎庶普避世事二年廣務農桑皆至正十九年六月初六日後二十二年壬寅十一月黃鍾吉旦立石斯寨也綠水崎嶇山名石秀前衝石門山後負兩女寨左有堡嶺寺右有鷄阜山上下一舍之餘山勢似龍虎爭鬪之形澗溪如龜蛇盤曲之體先賢造作之遺跡也至正十一年辛卯偶值東夷兵革漸至陝境官僚醫卜士庶賢愚皆願此洞潛

遁至癸卯隱居一十三年矣太平之年何日而獲故爲是題云

明文運熙飛雲洞開路記邑之東二十里有洞名官家古矣河環一帶之流山峙萬丈之巘石竇鑿其中高高下下參差於巖岫間者縣亘百里志云避兵而作也縣尹御史蕭居焉棧道連雲石梯落霞網戶萬啟星牕千開眞幽之第一勝槩也柰歲久路湮不可階升故景雖奇而未嘗著聞者遊觀稀也邑之民李福趙介欲闢其路令僧眞普請命於邑侯秦可之作簿丐緣官捐其俸民輸其材鳩工數十以董之石以爲階就基也木以爲檻防仆也邑之崇神者繪諸像於各洞中以壯觀焉肇役於萬歷己卯五日落成於庚辰陽之杪上吉日余以歲耑閑暇爰約金蘭徐步以遊則地不殊舊景益增

新臥被大虛之雲起鏡東岡之月風雨驟來空谷播絲竹之韻露霜偶凝庭宇砌瓊瑤之階八萬三千之戶不殊金樞七十四回之遊有同峻院日車駛於穴中雲衣生於石上易其名曰飛雲允於洞爲不誣遂之探勝尋幽者見桃花夾岸知有問津之人望麻飯常流不負遊山之夢覽斯記也不與歸盤谷之文遊赤壁之賦有同志者哉

右中嶺官家洞

明邠州志肖塔山在縣東四里又云窰谷義谷麻谷俱在縣東三里肖塔田山之下

縣舊志形似七級浮屠亦石闕之支

右肖塔山

明邠州志雞阜山在縣東北二里

三水縣志卷二

四

縣舊志雞阜山舊縣城址在其前侯君集家當其麓

右雞阜山

明邠州志黑石巖在縣東五十里

縣舊志巖色黝黑壁立萬仞林木陰翳

通志佛面坡卽黑石巖見名山記

右黑石巖

明邠州志蒲谷在縣東二十五里

右蒲谷

明邠州志甘谷在縣南十里舖

縣舊志爲赴省孔道水疇高低衢柳參差南上五里長阪通古公原

右甘谷

明邠州志柳谷在縣南三十里

右柳谷

明邠州志後谷在縣北十里

右後谷

縣舊志堡嶺在縣東三十里卽漢之左谷後秦魏武王姚襄立寨三百六十堡嶺其一也上有元人所建蘭若旁支俗名龍髻孝子文少蒼易名龍山種柏千株翠色欲滴

右堡嶺

縣舊志石髻山亦名馬闕在縣東十五里三面壁立如削一徑宛壇水經其下彎環曲抱

右石髻山

賈志豳山一名翠屏山一名挂榜山在縣治南大雅所謂南岡縣舊志峯有孫眞人行祠元夕並二月二日隨山布鐙若列星焉

右翠屏山

縣舊志焦家山在挂榜山南五里

右焦家山

縣舊志戴家山自石門北折入林木陰翳不復平壤

右戴家山

縣舊志蘭林山至縣六十里日出銜照丹霞掩映

右蘭林山

通志兩女砦在縣東北七十里其麓有兩冢俗傳爲秦扶蘇二女葬處

右兩女砦

縣舊志白虎谷在縣西北十五里卽唐鄭谷詩所謂谷評白虎藏岩洞是

右白虎谷

縣舊志神林山在縣東七十里因有茂公祠得名

右神林山

縣舊志鳳皇山在縣西北隅岡若鳳形舊有阿徒堡廢址存

右鳳凰山

縣舊志蟠龍山去縣三十五里

右蟠龍山

縣舊志劉家山在縣東四十里舊有炭窯康熙四十年久雨崩陷民失其利

右劉家山

縣舊志捫天嶺在石門南曰攢天嶺文翔鳳改名

右捫天嶺

縣舊志觀音巖在趙洞左上則藤蘿垂陰下有紆曲遇暎乾祈輒應

右觀音巖

縣舊志桑邨洞在官家洞左或爲元西臺御史桑哥失里所穿門依碧流攬勝所集

右桑邨洞

縣舊志趙家洞亦名琅天洞去縣二十五里光祿文翔鳳生于洞陽柏下其巖深長寬平可眺遠內有石室

右趙家洞

縣舊志流石洞右谷中環繞如城谷口對峙如門遠眺平田水

有枕流之想

右流石洞

縣舊志白石洞在縣東七里文倬天種桃百株其麓改曰桃源洞春月紺紅如錦

右白石洞

水屬五

縣水見于書傳者有汎水最古周書王乃升汾之阜以望商邑汾字說文作汎汎汾聲相近也縣有分水嶺初學記云水經注有白水源出汾水嶺西知汾水嶺乃汎水嶺嶺以水召俗呼之分水耳樂史引水經以大陵水爲卽詩皇澗今水經無此文未知何据羅川水見元和郡縣志而舊志云又名勅修川爲後秦姚襄得名亦不知何出其餘諸小水皆是俗稱今考縣大小有

二曰汎水源出鄜川宜君縣界石門山西南流入縣界連家河水出縣東馬欄山西北注之汎水又西南東澗河水自城東門外東南注之汎水又西逕縣治南稍泉北入焉汎水又屈南西溪河水自城西南流注之次南溫涼河水出縣西寶峯谷南流注之汎水又西南蒼耳溝水西南注之汾水又西南至邠州界南入于涇曰羅川水出縣北分水嶺西南流大陵水自甘肅徵寧縣來西南注之羅川水又西南至邠州東北界南入于涇小水三曰梁渠川出縣北二十里西南流至邠州入于涇曰七里川出縣南六十里西南流至淳化縣入于涇曰清水出縣東石門山東南入西安府耀州界至涇陽縣北入于冶谷水湫曰萬壽湫見新唐書觀音湫見舊志泉曰一泉金泉白馬泉稍泉松林泉今著于左

爾雅西至於邠國謂之四極

許君說文汎西極之水也从水八聲爾雅西至于汎國謂之四極

明邠州志三水縣三水河在縣南發源宜君縣競窩山西流四十里入于涇

西安府舊志汎川水源出石門山流合玉泉白馬泉稍泉故三水以名縣

縣舊志汎川在縣城抱南圍亦名師水灌漑川田民獲其利過縣四十里入涇

右汎水一名三水河

金史地理志新平有潘水

星衍案汎潘聲相近疑一水

右潘水

太平寰宇記三水縣有古邠城在龐川水西

星衍案汎龐聲亦相近疑亦一水

右龐川水

太平寰宇記安定縣洛水按水經云一名馬嶺川酈元水經注云洛水又南經柤邑入涇

又三水有馬嶺山馬嶺水出焉

又珊瑚谷水水經云珊瑚水東南至柤邑入洛

星衍案此水今經長武縣入涇不經三水以樂史云經柤邑城故載之

右馬嶺川一名洛水及珊瑚水

通志三水縣蒼耳溝水在縣南十五里西南流入汎水

右蒼耳溝水

明邠州志三水縣金泉在縣北二十里車川邨其水色黃
縣舊志金沙泉通志云昔有人飲此水見金色燦爛故名之唐
鄭谷詩所謂地湧金泉過石門

右金泉

明邠州志三水縣白馬泉在縣東大像寺之下

縣舊志白馬泉陰雨則伏而不流曠乾則湧而溢出莫測其異
右白馬泉

明邠州志三水縣稍泉在縣東三里四時常從高山湧出產蠟
明文濤遊稍泉詩云幽徑蒼無際捫蘿到水頭看山僧共坐麋
句鳥相酬雲落空潭影蟬鳴古樹秋登高聊一望暮雨鎖煙樓
右稍泉

三水縣志卷二

九

明邠州志三水縣玉泉在縣東二里玉泉觀左味甘美或浣穢
衣卽涸

縣舊志甲寅夏知縣林逢泰禱雨于此立應

右玉泉

明邠州志三水縣松林泉在秦輝鎮松林城下水出如珠

右松林泉

縣舊志堡嶺泉名龍泉亦名天池在堡嶺絕頂四面石壁泉自
嶺上直流而下昔元人據嶺汲飲不斷賴此

右堡嶺泉

縣舊志觀音湫去縣二十里凡遇天旱禱雨輒應

右觀音泉

縣舊志石門湫亦名乾湫在扶蘇廟下禱雨有應

星衍案此水今亦不經三水

右石門湫

詩夾其皇澗

太平寰宇記眞寧縣有大陵水注水經云大陵山陵水出焉巡
和南殊川西南逕寧陽縣故豳詩云夾其皇澗陵水卽皇澗也

案樂史所引水
經今本皆無文

明邠州志三水縣支唐川在縣北三十里

縣舊志皇澗在縣北二十里當溥源之後俗譌名爲唐川

右支唐川一名大陵水一名皇澗

水經注五丈渠水出雲陽縣石門山謂之清水東南流逕黃欽
山西又東入役翎縣

通志清水在三水縣東六十里源出石門山東南流入耀州界

三水縣志卷二

十

右清水

元和郡縣志三水縣以縣界有羅川谷三泉並流故以爲號

太平寰宇記眞寧縣羅川水自彭原縣界流入又云羅川水出

羅山

文獻通考三水有羅川水

金史地理志三水有羅川水

縣舊志勅修川在縣東北爲後秦姚襄得名源出分水嶺經延
川南奔合皇澗達于涇水

通志勅修川一名羅川在縣東北二十里

右羅川一名勅修川

唐書地理志三水有萬壽湫大歷八年因風雷而成

明邠州志三水縣萬壽湫在故城北三十里

縣舊志湫在縣東二十五里當羅唐兩川之處

右萬壽湫

明邠州志三水縣梁渠川在縣北二十里

縣舊志過澗亦名梁渠在縣西北一十八里文與可丹淵集所謂三泉之炭泉者澗起於溥原自北而西南過境爲過澗

星衍按唐昭仁寺碑云投過澗而自滿則此水名過澗或唐人有所据明邠州志又云洪龍河在州西卽過澗又異

右梁渠川一名過澗

明邠州志三水縣連家河源出馬欄山

縣舊志連家河在縣東十里發源石門繞中嶺北流入汎水

右連家河

明邠州志姜原河流入於涇

縣舊志七里川在縣東南其地舊爲寧谷驛山回水折去佛面坡不遠

通志七里川一名姜原河在三水縣南六十里又云在淳化縣自三水流入又云源出石門山自三水縣西南流七里川又逕三里原爲姜嫫河

右七里川一名姜原河

明邠州志三水縣西三里冬溫夏涼故名

縣舊志溫泉在寶峯谷中其流出爲溫涼河沍寒不凍蘊隆生涼味甘

明錢若愚遊煖泉記三水之西有煖泉雖亢旱不竭沍寒不漸故謂之煖泉又謂之溫涼河去城一里許北向而八有微逕過柳溪數十武兩岸如門磬折而入又數十武始陟其麓

登少墟寺寺岑寂無僧惟蘭若而已寺之左右一二居民陶復穴居蓋邠之遺俗也迤西又數十武拾級而上山愈峻徑愈仄童子翌之乃克登至此蓋三休矣俯視溪流微渺如綫因度之曰此泉之末流也諦視湔湔然鬻沸之盡矣徐聽之水聲嗚咽洒洒然如風雨聲又徐而觀聽之飛流觸石璆璆然如漱玉聲此源之將窮處也既而天日開朗石隙瀕洞溪流滂沛瀉出於兩山之間者煖泉也掬飲之味甘冽訊之故老云飲之能消渴疾祛煩暑且宜釀居民爭引之灌田走畦可數百畝此泉之利用也仰視懸崖瀑布疊流貫珠飛翠沾洒清冷逼人咸思挾纊矣積雪未消冰山在目宛然瓊島也予曰噫嘻此亦釀泉也予曩過滁滁人共遊釀泉之盛今此愧無醉翁耳於時草木叢茂禽鳥鳴集惠風徐來人物熙暢

因與益齋陳子綿江王子竹軒于子喬生濟民張生騰霧萬生順寧李生子元例官張祿暨厥子騰蛟輩環列而坐戲以酒卮效爲曲水流觴之飲溪凡九曲殺以三級命二三童子承杯上流信其所止而飲時薄暮弗暇爲詩又作爲小令使工人歌以侑觴任其音節之短長而止焉聲已而杯輒至由是咸弗勝飲者矣酒旣古泉子歌之曰泉冽兮淋浪酒馨兮泛瓊漿飲且樂兮壽而康安得惠吾民兮澤四方歌旣衆相稱賀曰今茲之遊亦蘭亭之勝事也予于咏歸之際述之爲記將以吉夫後遊者右溫涼河一名溫泉

縣舊志東澗河水在城東門外清流如綫環堞注于泃昔嘗導入城今廢

右東澗河水